

## Morning Dogri (NSD) National News Bulletin 14-10-2024

### आकाशवाणी

- केन्द्र नै जम्मू कश्मीर च राष्ट्रपति शासन हटाई दित्ता ऐ। उमर अब्दुल्ला होरें सरकार बनाने दा दावा पेश कीता ऐ।
- भारतीय जनता पार्टी नै केन्द्री गृहमंत्री अमित शाह ते मध्यप्रदेश दे मुखमंत्री मोहन यादव होरें गी हरियाणा बीजेपी दी अपना लीडर चुनने लेई होने आली विधायक दल दी मीटिंग लेई केन्द्री निगरान दे तौरा पर नियुक्त कीता ऐ।
- राष्ट्रपति द्रौपदी मुर्मू होरें अल्जीरिया दे अपने इतिहासक दौरें दरान भारत ते अल्जीरिया बश्कार डूंहगे ते बदलदे राजनीतिक सरबंधै बारै गल्ल कीती।
- लोकसभा दे अध्यक्ष ओम बिरला होर अज्ज जिनेवा च अंतर-संसदीय संघ दी मीटिंग च हिस्सा लेंगन।
- भारत नै ताईपे गी हराइयै महिला सिंगल्स बैडीगो अंतराश्ट्रीय चैलेंज बैडमिंटन प्रतियोगिता जित्ती लैती ऐ।
- हॉकी इंडिया लीग प्रतियोगिता च खडारिणं दी निलामी च बिकने आह्ले हरमनप्रीत सिंह सारे शा मेंहगे खडारी बनी गे न।

<><><><><><>

### Prez Rule- J&K

केन्द्र नै जम्मू कश्मीर च राष्ट्रपति शासन हटाई दित्ता ऐ, जेहदे कन्नै केन्द्र शासत प्रदेश व नमीं सरकार दे गठन लेई बत्त-पदरी होई गई ऐ। केन्द्र सरकार इस सरबंधै च अधिसूचना जारी री दित्ती ऐ। नैशनल कांफ्रेंस दे उप-प्रधान उमर अब्दुल्ला होरें जम्मू कश्मीर च नमीं सरकार बनाने लेई दाचा पेश कीता ऐ। ध्यानजोग ऐ जे हाल च होए दे असेंबली चुनावं दरान नैशनल कांफ्रेंस ते कांग्रेस गठबंधन नै सरकार बनाने लेई बहुमत हासल कीता ऐ। बतौर मुखमंत्री एह उमर अब्दुल्ला हुंदा दूआ कार्यकाल होग।

जम्मू कश्मीर थमां दफा 370 हटाए जाने ते इसी दऊं केन्द्र शासत प्रदेश च तक्सीम कीते जाने दे बाद इत्थें पैहली बारी लोकें आस्सेआ चुनी दी सरकार बनन जा करदी ऐ।

<><><><><><>

## BJP Appointment

भारतीय जनता पार्टी नै केन्द्री गृहमंत्री अमित शाह ते मध्यप्रदेश दे मुख्यमंत्री मोहन यादव होरें गी हरियाणा बीजेपी विधायक दल दी बैठक आस्तै केन्द्रीय निगरान नियुक्त कीता ऐ। पार्टी नै जम्मू कश्मीर बीजेपी विधायक दल दी बैठक आस्तै केन्द्री मंत्री प्रलहाद जोशी ते पार्टी दे राष्ट्रीय महासचिव तरुण वुग होरें गी केन्द्रीय निगरान नियुक्त कीता गेआ ऐ।

<><><><><><>

## President

राष्ट्रपति द्रौपदी मुर्मू होरें अल्जीरिया दे अपने एतिहासिक दौरें दरान अज्ज दौनें मुल्खें बश्कार गैहरे ते बधै करदे सियासी सरबंधै पर लोह पाई। एल्जियर्स च भारतीय समुदाय आस्सेआ उंदे सम्मान च आयोजित कार्यक्रम गी संबोधत करदे होई उनें आखेआ जे भूगोलिक लिहाज कन्नै भाए अस दवै मुख्य इक दुए कोला दूर छिंडे पर आं, पर दौनें बश्कार सरबंध अल्जीरिया दी अजादी कोला गै मते नेडमे रेह न। राष्ट्रपति त्रऊं मुल्खें दे अपने दौरें पर कल अल्जीरिया पुज्जियां जित्थें उंदा रस्मी तौरा पर निग्गा सुआगत कीता गेआ। द्रौपदी मुर्मू अल्जीरिया दे दोरे पर जाने आलियां पैहली भारतीय राष्ट्रपति न। ब्हाई अड्डे पुज्जने पर उत्थूं दे राष्ट्रपति अबदल मजीद टेब्बाउन होरें आपूं हुंदी अगुवानी कीती। अपने संबोधनै च राष्ट्रपति मुर्मू होरें उत्थें रौहने आले भारतीय समुदाय दे लोकें गी भारत दे विकास च योगदान देने लेई सराहना कीती। द्रौपदी मुर्मू होरें आखेआ जे 140 करोड़ भारतीय दे सांझे जतनें कन्नै अस मेदे ते उच्चिएं आस तांगें दे नमें सफर पर टुरना शुरू होई गेदे आं।

<><><><><><>

## Drugs- Seized

केन्द्र सरकार दी नशीले पदार्थों की उक्का बी बर्दाश्त करने आली नीति ते नशा मुक्त अभियान तैह्त् दिल्ली पुलस दे विशेश सिगे ते गुजरात पुलस नै सांझी कारवाई करदे होई गुजरात च 518 किलो कोकिन जब्त कीता ऐ। सूत्रें मूजब एह कोकिन गुजरात दी अंकलेशवर च अवकार ड्रग्स लिमिटेड कंपनी थमां बरामद होआ। जब्त कीते गेदे कोकिन दी अंतर्राष्ट्रीय बजार च अनुमानित कीमत 5 ज्हार करोड़ रपे ऐ।

<><><><><><><><>

## Speaker Birla

लोकसभा दे स्पीकर ओम बिरला होर अंतर संसदीय संघ आईपीयू दी 149मीं बैठक च भारत दे संसदीय प्रतिनिधिमंडल दा नेतृत्व करा करदे न। इस सिलसिले च ओह जंदी रातीं जिनेवा पुज्जी गेदे न। ओम बिरला होरें आखेआ जे ओह “मते रमानदार, सुरक्षित ते खुशहाल भविक्ख लेई विज्ञान, टेक्नालोजी ते नवाचार दे इस्तेमाल” विषय पर बैठक गी संबोधत करगंन। एह बैठक इस म्हीने दी 17 तरीक तोड़ी चलोग। ओम बिरला अज्ज आईपीयू दी संचालन परिषद दिएं बैठकें च हिस्सा लैंगन ते अज्ज गै जिनेवा च भारतीय मूल दे लोकें कन्नै बी मलाटी ते गल्लबात करगंन। प्रतिनिधिमंडल च राज्यसभा दे उपसभापति हरिवंश सिंह, दौनें सदने दे महासचिव ते किश होर सांसद बी शामिल न।

<><><><><><><><>

## IMD

मौसम विभाग नै अगने 3 थमां 4 दिनें दरान तमिलनाडू, पुडुचेरी, कराईकल, केरल ते तटीय आंध्र प्रदेश च तेज बरखा दी संभावना जताई ऐ। मौसम विभाग नै कल तटीय ते दक्खण कर्नाटक च बी भारी बरखा दी संभावना जाहर कीती ऐ। इस हफते दरान गुजरात, कोंकण, गोवा, मध्य महाराष्ट्र, मराठावाड़ा, छत्तीसगढ़ च हल्की बरखा नेई सकदी ऐ।

<><><><><><><><>

## TN- Rains

तमिलनाडू च मौसम विभाग ने अज्जै थ्मां अस महीने दे 17 तरीकै तोड़ी बरखा पोने दी संभावना जताई ऐ। क लते बुधवार गी राज्य दे उतरी तटीय जिलें च तेज बरखा दी चेतावनी जारी कीती गई ऐ। मच्छलियां फगड़ने आहले मच्छेरें गी अगले 5एं दिनें तोड़ी समुंद्रै च नेई जाने दी सख्त चेतावनी दिती गई ऐ। राज्य च इस हफते उत्तर पूर्वी मानसून दे कन्नै तेज बरखा दी संभावना ऐ।

<><><><><><><>

## Trump

अमरीका च कैलिफोर्निया दे कोचेला च कल साबका राष्ट्रपति डोनाल्ड ट्रंप हुंदी रैली थमां पैहले इक व्यक्ति गी गिरफ्तार कीता गेआ। पुलस मूजब इसी रैली आली थाहर थमां लगभग इक मील दी दूरी पर फगड़ेआ गेआ। एहदे कश फर्जी प्रेस कार्ड, प्रवेश पत्र ते बंदूक बरामद कीती गई। गिरफ्तार व्यक्ति दी पंछान 49 ब'रे दे वेम मिलर दे तौर पर होई ऐ जेहड़ा लॉस वेगास दा रौहने आला ऐ।

<><><><><><><>

## Badminton

भारत दी तानिया हेंमत नै आस्ट्रेलिया च खेड्डी जा'रदी बैडिगो अंतर्राष्ट्रीय चैलेंज बैडमिंटन प्रतियोगिता दे महिला सिंगल्स दे फाइनल च ताईपे दी टुंग चरु टांग गी हराइयै खिताब जित्ती लैता ऐं तानिया नै टुंग गी 21-17, 21-17 कन्नै हराया। तानिया दा एह त्रीया अंतर्राष्ट्रीय खिताब ऐ।

<><><><><><><>

## Hockey

भारतीय हॉकी टीम दे कप्तान हरमनप्रीत सिंह हॉकी इंडिया लीग प्रतियोगिता च खडारिएं दी निलामी च बिकने आहले सारे शा मेंहगे खडारी बनी गे न। सूरमा हॉकी क्लब ने हरमनप्रित गी 78 लक्ख रपे च खरीदेया।

अभिषेक नलामी च बिकने आहले दुए सारें शो मैंहगे खडारी रेह। बंगाल टाईगर्स नेक उनेंगी 72 लक्ख रपे च खरीदेया। ऐह्दे ईलावा हार्दिक सिंह गी यूपी रूद्रास ने 70 लक्ख च खरीदेया। प्रतियोगिता इस बरै 28 दिसंबर गी शुरू होग।

<><><><><><>

## ISSF

भारत अगले बरे आईएसएसएफ जूनियर विश्व कप दी मेजबानी करोग। अंतराष्ट्रीय नशानेबाजी खेड्ड परिसंघ दे अध्यक्ष लुसियानो रोसी नै एह्दी पुष्टि कीती ऐ। विश्व कप फाइनल थमां पैहले ओह कल नमीं दिल्ली च संवाददाता सम्मेलन गी संबोधत करा'रदे हे। उनें दुनिया भरै च नशानेबाजी दी बधदी लोकप्रियता च भारत दे योगदान दी सराहना कीती।

<><><><><><>

## Tennis

टेनिस च भारतीय खडारी यूकी भांबरीए रित्विक चौधरी बोलीपल्ली ते अर्जुन खडे अज्ज कजाकिस्तान दे अल्माटी च अल्माटी ओपन पुरुष डब्लस दे प्री क्वार्टफाईनल च खेडगन।

<><><><><><>